



Nuuk 03-05-2023

UPA23/130

**Naalackersuisut innuttaasut nunaqarfinni isorliunerusunilu najugaqartut nammineerlutik illuliornissamut taarsigassarsinnaanissamut periarfissaat pitsanngorsarumallugu kiisalu nammineerlutik illuliornissamut taarsigassarsinissamut periarfissaannik ammaasseqqinniarlugit suliaqarnissamut peqquneqarnissaannik siunnersuut.**  
(Inatsisartunut ilaasortaq Jens NapatoK Naleraq)

Siullermik siunnersuuteqartoq Siumumiit qutsavigaarput, imatullu oqaaseqaateqassaagut:

Siunnersuuteqartoq tunngaviatigut isumaqatigaarput, tassa isorliunerusuni nammineerluni illuliat annertuumik piffimminni inissaqarniarnikkut kivitsilluarsimasut maanna pisoqalipput aserfallannerallu amerlasuutigit annertuujuusoq takunnissinnaanerput malillugu ersarilluarluni. Ilisimavarputtaa amerlasuutigit qujanartumik iluarsaassisarnerit ingerlanneqartarsimmammata qujanartumillu tamakku pitsanngoriaammik illuutilinnut pisarsimapput siammasissumik isiginnikkaanni soorunami amerlasuut aqqissugassanngorsimanagerat avaqqunneqarsinnaangilaq.

Nammineerluni illuliortarneq Namminersornerulluni oqartussaanerup nalaani Siumut aquttoralugu eqqunneqarpoq, tamannalu atuuffimmimi pitsaasumik ineqarneq eqqarsaatigalugu kivitsisimavoq. Siunertaq pitsaasoq innuttaasut amerlasuut namminneq pigisaminnik illuuteqalernerannik kinguneqarpoq, taamanikkullu periuseq atorineqartoq 95-5 atoneragut aki inuiaqatigiinni unamminartuusoq eqqarsaatigalugu siammasissumik innuttaasut akornanni atorluarneqarsimaqisoq oqaatigisinnaallutigu.

Ilumoorpoq ukiut atukkagut eqqarsaatigalugit nammineerluni illuliornissamik pilersaartoqartarpoq piffimminnili aporfiusinnaassut nalaanneqartartut pillugit ilaatigut sanaartorniarunnaartarlutik, soorlu aqqissuussineq maannakkut atorineqartoq sanaqateqarluni illuliorneq tunngavimmigut siunertaq ajunngikkaluartoq, sanaartorusuttumut isertitat aallaavigalugit illup akilerneqartalernissaa pineqarmat, tamanna amerlasuutigit aki unamminartorujunngorsimasoq eqqarsaatigalugu sanaartorniarunnaarnermik kinguneqartartoq ilisimaaraarput.

Siumut partiip anguniagaani ilaatigut ersarissumik ineqarneq pillugu allassimasuuteqarpugut, taakku Siumup nittartagaani allassimapput paasisassarsiorniartunullu takuneqarsinnaallutik/atuarneqarsinnaallutik, soorlu imatut allassimasoqarpoq:

- Nunaqarfinni illuliornermut iluarsaassinermullu aningaasaliisarnert naapertuunnerusumik ingerlanneqartarnissaat anguniarneqassaaq
- Sanaqateqarluni illuliortarneq nunatsinni tamarmut atuuttussanngorlugu aningaasaliiffigeqqittariaqarpoq
- Nunaqarfinni Isorliunerusunilu sanaartornermi aningaasalersueriaaseq 95/5 atorlugu illuliortitsisinnaaneq periarfissarsiuunneqassaaq

Naalackersuisut akissuteqaataat tamakkiisumik ilalerparput, oqaatigineqartullu isumaqatigaagut, soorlu suliniutit ingerlasut eqqaaneqarpoq, tamatumunngalu tunngalluinnartut suliat piffimmi suliniutigineqartut oqaatigineqarluni.

Nuannaarutigaarputtaaq Naalackersuisut akissutaanni Nunaqarfinni Illoqarfinnilu minnerusuni inissaaleqineq iliuseqarfiginiarmassuk, ilaatigut Partiit siuttui allaffigineqarsimasut saqqummiinissaq siunertaralugu takusinnaavarput, kiisalu aningaasalersueriaaseq 95-5-ip atuutilernissaa sulissutigineqartuttaaq allassimammat tamanna Siumumiit iluarisimaqaarput.

Tassa tunngaviatigut Siumumiit anguniakkatsinnut qulequtaq naapertuulluarpoq, taamaattumillu siunnersuut taperserlugu oqaatigissallutigu. Najugaqarfiit peqqinnarnerusut sumiiffinni assigiinngitsuni piulernissaat soorunami piusariaqartoq isumaqarfigaarput taamatuttaaq ilaqutariinnut illut naleqquttut sanaartornissamut periarfissaajuarnissaat kissaatigalutigu.

Siunnersuuteqartup ilaatigut tikitaa isumaqatigaarput tassa; Nunaqarfinni isorliunerusunilu illuutillit iluaqtissarsiarisinnaanerit misissuisitserusuppugut.

Naggataatigut Siumumi tulluutuutippaarput, isorliunerusunut nunaqarfinnullu pineqartumut aningaasaliissutit siunertaminnut atornerarnerat pillugit, ukiumoortumik kommunini nalunaarusiortoqartalernissaa pisinnaagaluarpat.

Taamatut oqaaseqarluta siunnersuut oqareennittut taperserlugu Sanaartornermut Ataatsimiititaliamut suliarilluarneqarnissaa kaammattuutigalugu ingerlateqqippaarput

Jens Kristian Therkelsen Siumut